

大正藏第 08 册 No. 0257

佛说圣佛母般若波罗蜜多经 1 卷

No. 257 [Nos. 250-255]

佛说圣佛母般若波罗蜜多经

西天译经三藏朝奉大夫试光禄卿传法大师赐紫臣施护奉 诏译

如是我闻：

一时，世尊在王舍城鹞峯山中，与大苾刍众千二百五十人俱，并诸菩萨摩诃萨众而共围绕。

尔时，世尊即入甚深光明宣说正法三摩地。时，观自在菩萨摩诃萨在佛会中，而此菩萨摩诃萨已能修行甚深般若波罗蜜多，观见五蕴自性皆空。

尔时，尊者舍利子承佛威神，前白观自在菩萨摩诃萨言：「若善男子、善女人，于此甚深般若波罗蜜多法门，乐欲修学者，当云何学？」

时，观自在菩萨摩诃萨告尊者舍利子言：

「汝今谛听，为汝宣说。若善男子、善女人，乐欲修学此甚深般若波罗蜜多法门者，当观五蕴自性皆空。何名五蕴自性空耶？所谓即色是空，即空是色；色无异于空，空无异于色。受、想、行、识，亦复如是。

「舍利子！此一切法如是空相，无所生无所灭，无垢染无清静，无增长无损减。舍利子！是故，空中无色，无受、想、行、识；无眼、耳、鼻、舌、身、意；无色、声、香、味、触、法；无眼界无眼识界，乃至无意界无意识界；无无明无无明尽，乃至无老死亦无老死尽；无苦、集、灭、道；无智，无所得，亦无无得。

「舍利子！由是无得故，菩萨摩訶萨依般若波罗蜜多相应行故，心无所著亦无罣碍；以无着无碍故，无有恐怖，远离一切颠倒妄想，究竟圆寂。所有三世诸佛依此般若波罗蜜多故，得阿耨多罗三藐三菩提。

「是故，应知般若波罗蜜多是广大明、是无上明、是无等等明，而能息除一切苦恼，是即真实无虚妄法，诸修学者当如是学。我今宣说般若波罗蜜多大明曰：

「怛[宁*也](切身)他(引)(一句) 唵(引) 誑帝(引) 誑帝(引)(二) 播(引)啰誑帝(引)(三) 播(引)啰僧誑帝(引)(四) 冒提 莎(引)贺(引)(五)

「舍利子！诸菩萨摩訶萨，若能诵是般若波罗蜜多明句，是即修学甚深般若波罗蜜多。」

尔时，世尊从三摩地安详而起，赞观自在菩萨摩訶萨言：「善哉，善哉！善男子！如汝所说，如是，如是！般若波罗蜜多当如是学，是即真实最上究竟，一切如来亦皆随喜。」

佛说此经已，观自在菩萨摩訶萨并诸苾刍，乃至世间天、人、阿修罗、干闥婆等一切大众，闻佛所说，皆大欢喜，信受奉行。

佛说圣佛母般若波罗蜜多经

【经文信息】大正藏第 08 册 No. 0257 佛说圣佛母般若波罗蜜多经

【版本记录】CBETA 电子佛典 Rev. 1.11 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】庄德明大德提供，CBETA 自行扫描辨识，摩訶工作室提供新式标点，其他

【其他事项】本数据库可自由免费流通，详细内容请参阅【中华电子佛典协会数据库版权宣告】
